

四明叢書

張宗祥



角上高
僧詩

四明張氏約園開雕

序

余集甬上耆舊詩成復錄古今高僧詩二卷凡二十一人列其後客有問余曰先生所錄耆舊詩上下二千年賢士大夫及布衣隱者人風可師若彼釋門諸公彼旣游于方以外矣乃亦臚于先賢奉爲模楷不已過乎余曰不然彼諸公雖方以外人也然余嘗考其風格溯其學術彼諸公固非方以外人也請以余所錄言之其風格若育王大慧禪師爲人好善疾邪之志與生俱生敢抗言賊檜之非毀衣焚牒身竄天南彼心固與張魏國

張橫浦諸公若一也海會中峯和尚自至元以後志存
避世水居屢居一舟一笠彼心固與謝晞髮鄭思肖諸
先生遙相合也延慶南洲法師爲建文皇帝設藥師鐙
詛北師及金川兵入公夜爲上薙髮得遜國彼心固與
方正學王潤伯諸公不異也其學術若延慶夢堂尊者
詞家推爲宿老傳其文法並稱名士蓋少學文于胡長
孺先生者也湖南夢觀法師少通春秋諸史命世之才
其後乃隱于釋氏蓋嘗從楊鐵崖先生于山中也延慶
蒲菴禪師早擅文名人目爲春雲起空秋月映水蓋嘗

親炙于虞文靖歐陽文公之門也是以大慧禪師有曰
余雖學佛者然愛君憂國之心與忠義士大夫等斯其
風格何如耶鐵崖先生敘夢觀法師有曰能以宗乘與
吾聖典合爲一載諸行事以俟昭代太平斯其學術何
如耶正使諸公猶在余方將灑掃相迎蒲蘭作供與之
通彼此之懷盡獻酬之妙解帶披襟不煩騎驛康樂所
云愜恨不早謝傳以當千載一日應亦同之今雖淵匠
旣傾緒言未墜若竟置諸品外任其別傳徒企支公之
虛懷不見東林之栖影將使交讓之漬割若鴻蒲同岑

之苔別爲異草其可乎其可乎然則如集中諸公余雖
臚諸先賢奉爲模楷固未過也客曰善請次其語于卷
首甬上森森亭居士李鄴嗣題

序

吾鄉方外詩凡數盛自大梅法常祖師移茅入山口吟
絕句亮闇黎咏宅山堰稱四明一絕至中峯老人廬居
舟居並傳高唱此吾鄉方外詩之始盛也其後南湖夢
堂尊者舟中蕉韻名重一時南洲夢觀蒲菴諸公俱辭
家宿老望傾朝野因有甬上十高僧之目此方外詩之
極盛也及湖南朗初上人從楊伯翼先生受詩遂於門
中轉授一朗三支俱經品目此方外詩之次盛也以至
里中雪嶠老人天才橫逸高步諸方密老祖懣天童海

內麟鳳盡集其門此方外詩之季盛也余幸從杲堂先生得追溯人風見其本末因其相詮次錄存其詩以見大略使諸公領袖釋門誠不媿矣至于今日嘯堂老人主席天童寒泉子自若耶數往來甬上遠菴和尚退居十二峯悟留法師小築秋水歛老諸大弟子慰弘于石輩盡後來絕秀俱得從杲堂先生游共相酬唱先生方錄諸公詩合爲一集使後人有續是編者當復以今日高僧詩爲一盛矣康熙戊午中秋日鹿亭居士胡德邁題

序

昔李杲堂選甬上耆舊詩有其人而後有其詩詩固以
人重矣其選高僧詩何莫不然甬上高僧古今可錄者
豈僅二十一人哉詩以言志惟此二十一人之志與杲
堂合梁公狄所謂逢其知音千載其一者蓋雖方外吾
不能外之否則非方外吾亦將外之矣吾何以知之吾
於杲堂引大慧禪師之言而知之大慧曰予雖學佛者
然愛君憂國之心與忠義士大夫等杲堂生際鼎革目
斷蒼旻聲沈碧蘚傷心於冥感之無路者久矣彼釋門

諸公有與張魏公張橫浦謝晦髮鄭思肖方正學王潤伯輩遙相合者固宜尊之敬之而詞家推爲宿老文法並稱名士春雲起空秋月映水其亦足多也矣昔姚石甫序黃香石詩曰人之一身有天地民物之事至沒世而獨稱其文章末矣乃又徒稱其詩抑又末然李杜白陸竟以詩人震耀今古吾謂此二十一人者方外之李杜白陸也余喜吟中峯詩有句云香巖不作靈雲死徒有是非喧兩耳又云掃除自己閒枝葉不打諸方爛葛藤帆飽固知風有力柁寬方覺水無情皆見道之作雖

然靈雲不死是非必辨葛藤不打枝葉猶存欲收吾帆
而風愈緊雖寬吾枕水終無情質諸中峯其將百不知
耶其何以就手揭開耶老宿清無侶紅葉滿霜天搔首
躊躇豈所謂寒月明如此浮雲掩不妨耶重刻甬上高
僧詩二卷旣竣因書所懷如此民國二十六年十月張
壽鏞序

甬上高僧詩卷上

鄞縣

李鄴嗣杲堂選評

胡德邁卓人較訂

大梅祖師常公一首

亮闍黎一首

大慧杲禪師一首

宏智老人覺公一首

中峰和尚本公二十二首

余錄高僧詩二十一人凡俗家于此及曾倡教此

方俱得列焉于唐得二人宋二人元一人

大梅祖師

法常襄陽人姓鄭氏貞元中于大梅山深處結茅
爲菴居其中有僧自鹽官來入山采拄杖迷失道
至菴問曰和上在此山多少時公曰惟見四山青
復黃又問出山路何處曰隨流去僧歸告鹽官復
使招之公答以偈曰摧殘古木倚寒林幾度逢春
不變心樵客遇之猶不顧郢人那得苦追尋初公
常參馬祖問如何是佛祖云卽心是佛公遂豁然

後馬祖聞公道風使一僧往言馬祖近日佛法又別道非心非佛公曰此老惑亂人不了任渠非心非佛我但卽心卽佛僧歸白祖笑曰梅子熟也其後從者日眾至千人遂名爲護聖寺公常云一日不作一日不食日中惟兩啖白塏餅子不同眾餐山間苦無水已有一虎跑泉涌出及公涅槃後全身葬于寺左虎復銜石卵砌之塔成虎卽伏死于前寺僧葬虎塔側曰虎侍者

山居

一池荷葉衣無盡
幾樹松花食有餘
剛被世人知住處
又移茅屋入深居

亮闇黎

元亮太和中人時鄞爲鄞縣令王元暉起它山堰
主水啟閉民德之亮公爲題一詩朱志載吾郡四
景四絕句以公題它山堰爲第一所云景絕而詩
亦絕者也公又作長歌一首以記其事附錄于此
歌曰它山堰堰在四明之鄞縣一條水出四明山
晝夜長流如白練連接大江通海水鹹潮直到深

潭裏淡水雖多無計停半邑人民田種費太和年
中有王令清儉爲官立民政昨因祈禱入山行識
得水源知利病棹舟直到溪巖畔極目江山波瀾
漫略呼父老問來由便設機謀造其堰壘石橫鋪
兩山鶯截斷寒流積溪水灌漑民田萬頃餘此謂
齊天功不毀民間日用自不知年年豐稔因阿誰
山邊卻立宅山廟不爲長官興一祠本是長官治
此水卻將飲食祭閒鬼時人若解感此恩年年祭
拜王元暉